



L'Uniun purila grischuna vul procurar per la segirezza d'animals e personal sin las alps.

FOTG DANIELA DERUNGS

«Uschia na va quai betg vinavant»

«L'unica schliaziun è ina nova emprova da midar la lescha da chatscha federala.» Quai ha il president da l'Uniun purila grischuna, Thomas Roffler detg a la FMR en connex cun la dumonda davart l'avegnir da las alps grischunas e la preschientscha dal luf. L'Uniun purila grischuna ha mess fil en guglia per ina midada da la lescha da chatscha. Ils represchentants da l'uniun vegnan a s'inscuntrar cun cusseglier naziunal Martin Candinas per determinar la via per iniziar ina revisiun da la lescha federala.

MARTIN GABRIEL/FMR

Il president da l'Uniun purila grischuna di cler e net: «Nus na survegnin nagin personal ch'è pront d'ir a lavurar la stad sin nossas alps sche quai dat vinavant inscuters cun il luf, sco succedi avant paucs dis en la Val Schons. Il personal che surpiglia ina gronda responsabladad per il muvel ad alp, n'è betg pront da sa confruntar cun il luf e perder ils animals.»

L'uniun purila dat alarm

Avant in onn ha il suveran svizzer renvià la revi-

siun da la lescha da chatscha federala che avess pussibilità als chantuns da reglar tenor basegn ils dumber da lufs. Suentar differents accidents cun stgarpadas d'animals da chasa entras lufs, ha il chantun pudì effectuar ina midada da l'ordinaziun per pudè sajettar lufs cun bleras stgarpadas e cun cumportament problematic.

A basa dals inscuters dals davos dis en il Grischun Central è il president da l'Uniun purila grischuna anc pli persvas che la situaziun da confruntaziun cun il luf en il Grischun è sa midada fitg dapi l'onn passà. «Nus essan pertscherts che



nus vegnin fitg baud suenter il NA dal pievel l'onn passà. Quai mussa dentant er che la situaziun per l'agricultura è pli che urgenta.»

La via politica vegn determinada

Cussegliaer naziunal *Martin Candinas* ha confirmà a la FMR ch'el saja vegnì contactà da l'Uniun purila grischuna en chausa revisiun da la lescha da chatscha federala. «Jau chapesch fitg bain ils pensiers dals purs. E jau sustegn l'idea per ina intervenziun sin via politica.»

En in emprim pass giaja quai uss per definir ensemen cun ils represchentants da l'Uniun purila grischuna la furma da l'intervenziun.

Stagiun d'alp cuntentaivla cun buna qualidad dal chaschiel

L'Uniun purila grischuna quinta che las alps grischunas vegnan a stargiar tranter ils 10 ed ils 20 da settember. Tenor il president *Thomas Roffler* vegnian las alps che hajan già da batter cun grondas tempesta da plievgia u schizunt granella a stargiar pli baud che las alps en il Grischun dal Sid. Decisiva saja l'aura e las temperaturas dals proxims dis. Dis da bell'aura cun temperaturas miaivlas pudessan prolongar l'alpegiaziun per ina enfin duas emnas. Fitg cuntent è il president da l'Uniun purila grischuna cun la produenziun da chaschiel d'alp. La qualidad dal chaschiel d'alp da quest onn saja oraifra, ha Thomas Roffler ditg a la FMR. (fmr/mg)